

INUIT ATAQATIGIIT

Inatsisartuni



UPA 2019/126
30-04-2019
Aqqa Samuelsen

Ullormik pinngortitamut qujamasuffimmik atulersitsinissaq pillugu Naalakkersuisut peqquneqarnissaannik Inatsisartunut aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Siullermik siunnersuuteqartumut Mimi Karlsenimut siunnersuutaanullu soqutiginarumut qujavugut. Siunnersuut pillugu Inuit Ataqatigiit imaattumik oqaaseqaateqarput:

Upernaaq manna pinngortitamut illersuinissamat siunertaqartut siunnersuutit ataasiinnaanngitsut saqqummiunneqarmata nuannaarutigisariaqarpoq. Tassuunakkut pinngortitamut pingaartitsinerput paarsilluarnissarpullu partiiniit tamaginnit Naalakkersuisuniillu oqariartuutigineqarnera maluginiarneqarsinnaalluarpoq.

Inuiaat Kalaaliusugut pinngortitamut eriaginninnerput ersarissuutikkusupparput. Pinngortitamut eriaginninneq tassaaginnangilaq pinngortitamik paarsilluarneq eqqiluutsuutitsinerlu. Pinngortitamut eriaginninneq aamma tassaavoq anersaakkut inuunermi nukittorsaataajuaannartussaq. Pinngortitamik pingaartitsineq Inuiaat Kalaallit anersaakkut nukittoqqutaanissaa Inuit Ataqatigiit pingaartippaat.

Qangaaniili ilisimavarput kiisalu ulloq manna tikillugu atukkatsinnik ullunik pingaartitatsinnik nalliussinitsinni nalliuttorsiortarluta.

Ukiut 300-nngulersut matuma siornatigut inuiannik allanik siulitta nunatsinni inooqateqalerneriniit ullut nalliuttorsiorfigisartakkavut annertuumik allannguuteqarsimapput.

Ullut nalliussisarsimalertakkatta amerlanersaat upperisamat, taakku aqqutigalugit atugarilersimasatsinnut tunngasuupput.

Pinngortitaq inuiattut kinaassutsitsinnut atalluinnarpoq. Pinngortitaq Nunatta erlinnartuutigivaa tamatsinnillu pingaartinneqartoq.

Inuiaqatigiittut immikkuullarissumik kinaassuseqarnerput pinngortitamik aallaavilik tulluusimaarutigalugu ataatsimoorfigisariaqarparput. Pinngortitaq ataatsimuussuserlu naleqartitatsinni pingaaruteqarluinnarput. Pinngortitami ataatsimoorfigisatut nukittunerulersarpugut, akisussaaffimmillu tigusinissatsinnut piunassusinittarluta.

Inuiaqatigiittut inuunitsinni pinngortitaq timikkut tarnikkullu annertuumik pissarsiffigisarparput. Pinngortitaq angalaarfigalugu ilaqutariittut piliniarfigisarparput nukissamillu aallerfigisarlugi. Pinngortitaq ilaqutariittut ataatsimoorfigisarparput, naleqartitavullu ataatsimoorfigisarlugit. Taamaattumik inuiaqatigiit napatinneqarneranni pinngortitaq pinngitsoorneqarsinnaanngilaq.

Pinngortitami inuussutissanik pinngitsoorsinnaanngisatsinnik pissarsisarput. Assersuutigalugu pinngortitaq aavariarfigisarparput, piniarfigalugu, aalisarfigalugu, naatsiivinni naatitsiffigalugu,

savaateqarfiulluni, assigiinngitsorpassuarnillu naasunik nerisassiassatut peqqissaatitullu atugassanik katersiffiusarluni, aammalu pinnersaasiassanik naasunik katersiffiusarluni.

Ukiuni inuuffigisatsinni nutaaliaasuni atajuarnissatsinni toqqammavissagut pinngitsooratik pinngortitameersuussapput.

Pinngortitamut ataqqinnittussaanerput akornatsinni eqqaasitsissutigisuartigu.

Inuiaqatigiittut inooqatigiinnitsinni ataatsimoorluta pinngortitamut naleqartitatta erseqqissarnissaat malunnartinnerunissaallu pisariaqartipparput.

Taamaattumik pinngortitamut qujamasuffimmik ulloqartitsisalernissatsinnut pissutissaqarluartugut Inuit Ataqatigiit isumaqarput.

Ullortunersiortarnerup ullukinnersiortarnerullu saniatigut kristumiussusermi Nunarsuarmioqataanitsinnilu FN-ip ullut nalliuttorsiorfiit taamaallaat nalliuttorsiuutigineqartarput. Inuiaqatigiittut naleqartitavullu aallaaviginerullugit ullormik pingaartorsiortarfissatsinnik pilersitsisariaqarpugut.

Inuiaqatigiit kalaallit annerpaamik pinngortitamiit pisuussutinik uumassusilinnik tunisassiormik inuussutissarsiuteqartuupput.

Nunatta iluani Avammullu niuernitsinni aningaasarsiornitsinnilu pinngortitap pisuussutai imartatsinnit nunamiillu niuerutigineqartartut annertoorujussuarmik toqqammaviliisuupput.

Ulloq pinngortitamut qujamasuffik ataatsimoorfigisigu, inuiattut nukittunerulersissammatigut. Inuiaat allat pingaartitaat kisiisa pinnagit uagut nammineerluta ulloqalerta, ulloq pinngortitamut qujamasuffik pilersinnissaa suleqatigiiffigalugu sulissutigisigu.

Taamaatut oqaaseqarluta siunnersuut ataatsimiititaliamut susassaqartumut ingerlateqqinneqarnissaa innersuussutigerusupparput.